

Mid-Day Dogri News Bulletin, 27 August 2025

समा - 12:25 hrs.

<><><><><><>

LG Review

समूलचे जम्मू प्रांतै च पेदी बरखा दे कारण हालात अजें बी चिंता आहले बने देन। उपराज्यपाल मनोज सिन्हा होरें जम्मू दे डिविजनल कमीशनर रमेश कुमार ते होरनें सीनियर अफसरें कन्नै गल्लबात करियै मजूदा स्थिति ते राहत ते बचाव कम्में दे बारे च तफसीली जानकारी हासल कीती ऐ। उनें अधिकारियें गी निर्देश जारी कीते न जे बिजली, पानी ते मोबाईल नैटवर्क ब्हाल करने दे जतनें च तेजी आंदी जा।

<><><><><><>

Jitender -Jammu

प्रधानमंत्री हुंदे दफतरै च राज्यमंत्री डाक्टर जितेन्द्र सिंह होरें आक्खेया ऐ जे जम्मू च तवि नदी दा स्तर बल्ले-बल्ले घटना शुरु होई गेदा ऐ- पर चनाह दरेया च पानी अजें बी खतरे दे निशान दे कश गै बगै करदा ऐ। अपनी इक सोशल मीडिया पोस्ट च डाक्टर जितेन्द्र सिंह होरें आक्खेया ऐ जे SDRF, NDRF, फौज, नीम फौजी बल ते एयर फोर्स, सिविल प्रशासन कन्नै नेड़मा तालमेल बनाइयै कम्म करै करदे न ते हालात पर नेड़मी तक्क बनाई रक्खी गेदी ऐ। उनें आक्खेया जे लोके दे बचाव ते राहत कम्में दे इलावा बिजली, पानी ते मोबाईल सेवाएं गी ब्हाल करने गी सब्भनें शा मती तरजीह दिती जा रदी ऐ, जेहदे लेई अमला दिन-रात लग्गे दा ऐ। मंत्री होरें आक्खेया जे ओ, हालात पर तक्क रक्खने लेई उप्परोतली डिविजनल कमीशनर रमेश कुमार हुंदे सम्पर्क च न। डाक्टर जितेन्द्र सिंह होरें दस्सेया जे प्रधानमंत्री मोदी होर आपू बी हालात बारे जानकारी कन्नो-कन्नी हासल करै करदे न।

<><><><><><>

CM-HM

मुख्यमंत्री उमर अब्दुल्ला होंरें जम्मू च लगातार माड़े हुंदे जा रदे हाड़ जनेह हालात बारे गृहमंत्री अमित शाह हुंदे कन्नै गल्ल कीती ऐ। सोशल मीडिया मंच एक्स पर कीती गेदी इक पोस्ट च उमर होंरें दस्सेया ऐ जे भारी बरखा करी जम्मू च बड़ा भारी नुक्सान होआ ऐ। हवाई अड्डा बंद होने कारण जम्मू नैई पुज्जी सकने पर बसोस बुज्झदे होई, उनें आक्खेया ऐ जे ओ हालात दी लगातार निगरानी करा करदे न।

<><><><><><>

Reasi Lanslide

जम्मू-कश्मीर च पिच्छले 24एं घंटे दौरान भारी बरखा दे चलदे समूलचे जम्मू संभाग च हाड़ें आहली स्थिती पैदा होई गेदी ऐ, केई सिडकां रुढ़ी गेदियां न ते जान-माल दा बी काफी नुक्सान होआ ऐ। रियासी जिले च कल श्री माता वैष्णो देवी जी दी यात्रा दे रस्ते च इक बड़ी पस्सी पौने कारण केई लोकें दी जान चली गई ते केई दुए घायल होई गेन। साहड़े जिला संवाददाता दविन्दर ठाकुर नै जानकारी दिती ऐ जे केई श्रद्धालू पस्सी दे मलबे हेठ दबोई गेदे न ते राहत ते बचाव कम्म जारी न। एहतियात दे तौरा पर यात्रा फिलहाल रोक दीती गेदी ऐ ते यात्रा दे दौने रस्ते बंद न। अज्ज बी बरखा दी चेतावनी दे चलदे प्रशासन पूरी चाल्ली सतर्क ऐ।

<><><><><><>

JK Govt. Order

जम्मू-कश्मीर सरकारै लगातार बरा करदी भारी बरखा दे मददेनजर अत-लाजमी सेवाएं ते कानून नाफिस करने आले मैहकमे गी छोड़ियै होरनें सब्भनें दफ्तरें ते शिक्षा इदारे गी बंद रक्खने दा हुकम जारी कीता ऐ। जारी इक संदेश च जम्मू दे डिविजनल कमीशनर रमेश कुमार होंरें आक्खेया जे खिते च सब्भनें स्कूलें, कालजें, कोचिंग सैन्टरें ते सिखलाई इदारे सनें दफ्तरें गी बी अज्ज बंद रक्खेया जाग।

<><><><><><>

Network Outrage

जम्मू दे इक दफ्तरै च कम्म करने आली पलवी नां दी कर्मचारी नै साड़े संवाददाता नै गल्ल करदे होई दस्सेया जे ओ अपने घर फोन करियै परोआर आलें गी इतलाह देना चाहंदी ही जे खराब मौसम करी उसी परतोने च चिर होई जाग, पर मोबाईल नैटवर्क च आई दी परेशानी करी ओ अपने परोआर कन्नै सम्पर्क नेंई करी सकी।

<><><><><><>